

四庫全書

子部

欽定四庫全書

子部
武編後集卷二

詳校官中書臣丁榮祚

編修臣倉聖脈覆勘

總校官知縣臣楊懋珩

校對官中書臣王璵

謄錄監生臣徐步青

欽定四庫全書

武編後集卷二

明 唐順之 撰

息亂

令孤楚為河陽節度使時烏重胤移鎮滄景以河陽銳卒三千人為牙兵士卒不願出鄉至中路潰散不敢歸屯於境上時楚未至聞之即疾馳赴鎮潰卒亦已至城北將大寇掠楚單車出迎諭以逆順咸令兵士弛弓釋

甲用之為先驅以歸仍斬其首惡衆遂定

五代李茂真為鳳翔節度性至寬有部將符昭者人或告其謀變茂真親至其家去爪牙熟寢經宿而還上下遂服之後漢誅王郎收文書得吏人與郎交關謗毀者數千章光武不省會諸將畢燒之曰令反側子自安

東晉盧循寇建業劉道規為荊州刺史遣將軍檀道濟等赴援朝廷至潯陽為循黨荀林所破林乘勝伐江陵聲言徐道覆已克建業而桓謙自長安入蜀譙縱以謙

為荊州刺史與其大將譙道福俱寇江陵荆楚既桓氏
義舊並懷異心道規乃會將士戒之曰桓謙今在近畿
聞諸君頗有去就之計吾東來文武足以濟事欲去者
不禁因夜開城門衆咸憚服莫有去者時雍州刺史魯
宗之自襄陽來赴或謂宗之未可測道規乃單車迎之
衆咸感悅乃使宗之居守委以心腹率諸將破斬謙及
荀林初謙至枝江江陵士庶皆與謙書言城內空實道
規一皆焚燒衆乃大安江漢士庶感其焚書之恩無二

志

西魏王羆守華州時西魏師與東魏師戰於河橋不利
東魏降卒趙青雀據長安城所在莫有固志羆聞之乃
大開城門召軍人謂之曰如聞天子敗績不知凶吉諸
人相驚咸有異志王羆受恩於此以死報恩諸人若有
異圖可來見殺必恐陷沒者亦任出城如有忠誠能與
王羆同心者可共固守軍人見其誠信皆無異志

宋元徽中桂陽王休範舉兵於潯陽朝廷惶駭蕭道成與褚

淵等集中書省議莫有言者蕭道成曰昔上流謀逆皆
因淹緩以敗休範必遠懲前失輕兵急下乘我無備請
屯新亭以當其鋒因索筆下議餘皆注同中書舍人孫
千齡與休範有密契獨曰宜依舊遣軍據梁山道成正
色曰賊今已近梁山豈可得至新亭既是兵衛所欲以
死報國耳乃單車白服至新亭築城壘未畢賊前軍已
至道成方解衣高臥以安衆心乃索白虎幡登西垣使
寧朔將軍高道慶等浮舸與賊水戰大破之斬休範首

餘賊進至杜姥宅車騎典籤茅恬開東府納賊宮內傳
新亭亦臨太后執蒼梧王手泣曰天下事敗矣道成遣
軍主陳顯達等從石頭濟淮間道自承明門入衛宮闕
時休範典籤許公與詐稱休範在新亭士庶惶惑詣壘
期赴休範投名者千數及至乃是道成隨得輒燒之登
城北謂曰劉休範父子皆已死戮屍在南岡下觀汝等
名皆已焚除勿懼也臺中遣衆軍擊平賊黨道成振旅
凱入百姓緣道聚觀曰全國家者此人也

定亂

曹瑋知渭州有告戍卒十餘人叛入夏國者瑋方對客奕棋不應軍吏亟白之瑋怒叱之曰吾固遣之去汝再三顯言也夏人即斬叛者投其首境上

趙世隆本磁州書佐宗澤在磁以為中軍將澤既去以州事付兵馬鈐轄李侃金人圍磁州急州有禁軍有民兵民兵甚衆禁軍恐其勢盛將校郭進乃作亂世隆與進謀遂殺侃以通判趙子節權州事至是世隆與其弟

世興將三千人歸澤將士頗疑之澤曰世隆吾一校耳必無他有所訴也乙卯世隆入拜澤面詰之世隆辭服澤笑曰河北臨沒而吾宋法令上下之分亦臨沒邪命引出斬之時衆兵露刃於庭世興佩刀侍側左右皆懼澤徐語世興曰汝兄犯法當誅汝能奮志立功足以雪恥世興感泣會滑州報金兵畱屯城下澤謂世興曰試為我取滑州世興忻然受命世興至滑州掩敵不備急攻之斬首數百得州以歸宗澤復厚賜之時有降寇趙

海者屯板橋輒塹路以阻行者管軍問掠芻者八人過其壘海怒而鬻之覘事者以告澤召之海以甲士五百自衛而入澤方對客海具伏即械之繫之獄客曰彼甲士甚衆姑徐之澤笑謂其次將曰領衆還營明日誅海於市聞者股慄統制官楊進屯城南王善者有衆二千餘皆山東游手之人先進來降屯城北二人氣不相下一日各率所部千餘相拒於天津橋都人頗恐澤以片紙諭之曰為國之心固如是耶當戰陣立功時勝負自

見二人相視慙沮而退

初利州都統王夔素殘悍號王夜叉恃功驕恣桀驁不受節度所至劫掠每得富家穴竄加頸四面然箕謂之篡蝕月以弓弦繫鼻下高懸於格謂之錯繫喉縛人兩股以木交壓謂之乾榨油以至用醋灌鼻惡水灌耳口等毒虐非一以脇取金帛稍不遂意即死其手蜀人患苦之且悉斂部將倖馬以自入將戰乃高其估賣與之朝廷雖知其不法在遠不能詰也大帥處分少不嫌其

意則百計撓之使不得有所為余玠至嘉定夔帥所部
兵迎謁纔羸弱二百人玠曰久聞都統兵精今疲敝若
此殊不稱所望夔對曰夔兵非不精所以不敢即見者
恐驚從人耳頃之班聲如雷江水為沸聲止圓陣即合
旗幟精明器械森然沙上之人彌望若林立無一人敢
輒亂行者舟中皆戰掉失色而玠自若也徐命吏班賞
有差夔退謂人曰儒者中迺有此人玠久欲誅夔獨患
其握重兵居外恐輕動危蜀謀於親將楊成成曰夔在

蜀久所部精兵前時大帥夔皆勢出其右意不止此也
視侍郎為文臣必不肯甘心從令今縱弗誅養成其勢
後一舉足西蜀危矣玠曰我欲誅之久矣獨患其黨與
衆未發耳成曰侍郎以夔在蜀久有威名孰與吳氏夔
固弗若也夫吳氏當中興危難之時能百戰以保蜀傳
之四世恩威益張根本益固蜀人知有吳氏而不知朝
廷一旦曦為畔逆誅之如取孤豚况夔無吳氏之功而
有曦之逆心恃狶突之勇敢慢法度縱兵殘民奴視同

列非有吳氏得人之固也今誅之一夫力耳待其發而
取之難矣玠意遂決夜召夔計事潛以成代領其衆夔
纔離營而新將已單騎入矣將士皆愕眙相顧不知所
為楊成以帥指譬曉之遂相率拜賀夔至斬之成因察
其所與為惡者數人稍稍以法誅之

缺文

漢景帝時吳楚反周亞夫將兵擊之吳楚乏糧欲退數

挑戰不出夜軍中驚內相攻擊擾亂至於帳下亞夫堅臥不起頃之復定

魏將張遼以荊州未定屯長社臨發軍中有謀反者夜驚亂起火一軍盡擾遼謂左右勿動是不一營盡反必有造變者欲以動亂衆人耳乃令軍中其不反者安坐遼親將兵數十人中陣而立有頃即定得首謀者並殺之

宋安守忠知雒州方與寮佐宴飲有軍校謀變褰甲及

門閭吏狼狽入白守忠言笑自若徐顧坐客曰此輩酒狂耳即時擒獲人頗服其量

唐大厯中城涇州段秀實為留後馬璘奉詔徙鎮涇州其士衆嘗自四鎮北庭赴難中原居僑驪移頗為勞怨刀斧將王童之因人心動搖導以為亂或告其事且曰候嚴警鼓為約矣秀實乃召鼓人佯怒失節且戒曰每更籌策盡必來報每更輒延數刻四更畢而曉既差互亂不能作告者復曰今夜將焚草場期救火者同作亂

秀實嚴警備夜半火發令於軍中曰救火者斬之童之居外營請入救火不許明日斬之

王翊為河中少尹有悍將凌正者橫暴擾軍政約至夜鼓譟斬關以逐翊有告者翊縮夜漏數刻以差其期賊驚遠遁遂誅正軍城安

宋師平成都綿州都校全師雄謀叛賊約以三鼓攻城裨將曹翰諜知之戒掌漏者但擊二鼓賊衆不集至明而遁我師襲破之

宋檀祇為廣陵相亡命司馬國璠兄弟自北徐州界聚衆四百潛過淮因天陰闇夜率百許人緣廣陵城得入叫喚直上廳事祇驚起出門將處分賊射之傷却入祇密語左右曰賊乘暗得入掩我不備但打五更賊懼曉必逸賊聞鼓鳴將謂曉於是奔散追討盡獲之

宋太祖朝劍外初平馮瓚知梓州視事纔數日偽軍校上官進嘯聚士卒三千餘衆劫村民數萬人夜攻州城瓚曰賊乘夜奄至此烏合之衆以箠相達擊必無固

志正可持重以鎮之待旦自潰矣衆巡城密令促其更
籌未夜分擊五鼓賊悉遁去因縱兵追之擒上官進斬
於市招誘餘黨得千餘人並赦其罪令復業郡境以安
軍校呂翰殺武懷節據嘉州叛曹翰及諸將奪其城謀
賊約三鼓復來攻翰戒知更使緩向晨猶二鼓賊衆不
集而潰因而破之

唐曲環鎮許州劉昌裔為營田副使有兵馬使安國寧
與畱後上官說不善謀反以城降蔡賊事洩昌裔密計

斬之即召其麾下千餘人人賞縑二疋伏兵要諸巷令持縑者悉斬之無一人得脫

東魏西荆為梁將曹義宗所圍東魏召人赴救慕容儼應募赴之時魏北涓太守宋帶劍謀叛儼乃帥騎出其不意直指城下語云大軍已到太守何不出迎帶劍惶恐不知所為使出迎儼即執之一部遂定

唐高祖為山西河東道撫慰大使率兵以禦羣盜行至太平關遇賊數千人時所將兵少左右皆懼高祖謂之

曰此烏合之衆易與耳因率精騎十二人出擊之所向
皆靡衆情始定併力奮擊遂大破之

撫降

後漢更始初光武為蕭王定河北諸賊銅馬餘衆降封
其渠帥為列侯降者猶不自安光武知其意勅令各歸
營勒兵乃自乘輕騎案行部陣降者皆相語曰蕭王推
赤心置人腹中安得不投死乎由是皆服

隋絳郡賊柴保昌等有衆八萬煬帝令戶部尚書樊子

蓋擊之子蓋深溝高壘不敢決戰有來歸首者不問多少必坑之由是莫敢降賊徒日盛連年不能克煬帝乃令唐高祖代之賊有來降者皆引致左右推赤心以待之人人自安願効死力其黨相謂曰我輩本無逆心徒以政令嚴酷懼死為盜耳前後首者皆為子蓋所殺窮無所歸今唐公與人無隔恩意如此我輩知不死矣遂相率歸前後至者數萬人餘賊散走他郡

唐淮西既平裴度為節度招撫使蔡人大悅舊令途無

偶語夜不然燭人或以酒食相過從者以軍法論度乃約法惟盜鬪殺外餘盡除之其往來者不復以晝夜為限蔡之遺黎始知有生人之樂度以蔡卒為牙兵或以為反側之徒其心未安不可自去其備度笑而答曰吾受命為帥元惡就擒蔡人即吾人也父老無不感泣

後漢初河南賊張步據齊地漢將耿弇討敗之步肉袒負斧鑕於軍門弇傳步詣行在所勒兵入據其城樹十二郡旗時步衆尚十餘萬輜重七十餘兩弇令降軍各

以郡人詣旗下皆罷遣軍人令歸鄉里齊地悉平

後魏末河北賊葛榮為魏將爾朱榮所擒餘衆悉降榮以賊徒既衆若即分割恐其疑懼或更結聚乃下令各從所樂親屬相隨任所居止於是羣情喜悅兵即四散數十萬衆一時散盡待出百里之外乃始分道押領隨便安置咸得其宜擢其渠帥量才授用親附咸安時人服其處分機速

隋山獠作逆以衛玄為資州刺史以鎮撫之玄既到官

時獠攻圍太平鎮玄單騎造其營謂羣獠曰我是刺史
銜天子詔安養汝等毋驚諸賊莫敢動於是說以利害
渠帥感悅解兵歸服者十萬餘

唐將丘行恭大業末聚兵有衆二萬保固郡城百姓多
附之原州奴賊數萬人圍扶風郡太守竇璡堅守經數
月賊中食盡野無所掠衆多離散投行恭者千餘騎行
恭遣其酋渠說諸奴賊兵迎義軍行恭又率五百人皆
負米麥持牛酒自詣賊營奴帥長揖行恭呼斬之謂其

衆曰汝等並是好人何因事奴為主使天下號為奴賊
衆皆俯伏曰願改事公行恭率其衆共謁太宗於渭橋
北

張儉前在朔州屬李靖平突厥之後有思結部落貧窮
離散儉招慰安集之其不來者或居磧北既親屬分住
私相往還儉並不拘貴賤但存紀綱羈縻而已及儉移
任州司謂其將叛遽以奏聞朝廷議發兵進討仍起儉
為使就觀動靜儉單馬推誠入其部落召諸首領布以

腹心咸啟。賴而至便。移就代州。即令檢校代州都督。儉遂觀其營田。每年豐熟。慮其私蓄富實。易生驕侈。表請和糴。擬充貯備。蕃人喜悅。邊軍大收其利。

唐將郭元振在涼州時。西突厥首領烏質勒部落強盛。款塞通和。元振就其牙帳計會軍事。時天大雪。元振立於帳前。與烏質勒言議。須臾雪深風凍。元振未嘗移足。烏質勒年老不勝寒苦。會罷而死。其子娑葛以元振故殺其父。謀勒兵攻之。副使解琬知其謀。勸元振夜遁。元

振曰吾以誠信待人何所疑懼且深在寇庭遁將安適
乃安卧帳中明日親入虜帳哭之甚哀行弔贈之禮娑
葛乃感其義復與元振通好

郭子儀屯於涇陽僕固懷恩率蕃虜來寇子儀一軍萬
餘人而雜虜圍之數重子儀使李國臣拒其東魏楚玉
當其南陳回光當其西朱元璋當其北子儀率甲騎二
千出沒左右前後虜見而問曰此誰也報曰郭令公也
回紇驚曰令公存乎僕固懷恩言天可汗已棄四海令

公亦謝世中國無主故我從其來今令公存天可汗存
乎對曰皇帝萬壽無疆回紇皆曰懷恩欺我子儀又使
諭之曰公等頃歲遠涉萬里剪除兇逆恢復二京是時
子儀與公等周旋艱難何日忘之今一旦棄舊好助一
叛臣何其愚也且懷恩背主棄親於公等何有回紇曰
謂令公亡矣不然何以至此令公誠存安得而見之子
儀將出諸將諫曰戎狄之心不可信也請無徃子儀曰
虜有四十倍之衆今力固不敵且至誠感神况虜輩乎

諸將曰請選鐵騎五百衛從子儀曰適足以為害也乃傳呼曰令公來虜初疑持矢待之子儀以數十騎免胄徐出而勞之曰安乎公等久同忠義又何至於是回紇皆捨兵下馬齊拜曰果吾父也子儀召其首領各飲之酒與之佳錦歡好如初

馬燧討李懷光於長春宮懷光將徐庭光以兵六千守宮城禦備甚嚴燧度長春不下則懷光自固攻之曠日持久所傷必多乃挺身至城下呼庭光庭光素憚燧威

名拜於城上燧度庭光心已屈乃徐謂之曰我來自朝廷可西面受命庭光復拜燧乃諭之曰公等皆朔方將士祿山已來首建大勲四十餘年功伐最高奈何棄祖父之勲力背君上為滅族之計耶從吾言非止免禍富貴可圖也賊徒皆不對燧又曰爾以吾言不誠今相去不遠數步爾當射我乃披襟示之庭光感泣俯伏軍士亦泣下先一日賊焦籬堡守將尉珪以兵二千因堡降燧庭光東道既絕乃率衆出降燧以數騎徑入城處之

不疑莫不畏服

唐嗣曹王李臯遷湖南觀察使前使辛京杲貪殘有將
王國良鎮邵州武岡縣豪富京杲以死罪加之國良危
懼遂散財聚衆據縣以叛諸道同討連歲不能下臯受
命乃曰驅疲氓誅反側非所以奉聖朝事遣使遺國良
書曰觀將軍非敢大逆蓋遭讒嫉將軍遇我何不速降
我與將軍同為辛京杲所構我已蒙聖朝昭雪使我我
何必持刃殺將軍耶將軍以為不然我以陣術破將軍

陣以攻法屠將軍城非將軍所度也國良且憂且喜遣使請降亦未決臯即日赴縣受降中道有候騎馳告曰國良軍中有變言降是詐也臯曰非爾輩所知遂留麾下兵單騎假稱使者徑入國良壘中國良召使者入臯遂大叫軍中曰有人識曹王否只我是國良何不速降一軍愕眙不敢動適有識者走至傳呼曰是國良匍匐叩頭請罪臯執手約為兄弟盡焚攻取之備散倉庫給兵士令復農桑焉

招降

昭公十三年魯叔弓帥師圍費弗克敗焉平子怒令見費人執之以為囚俘治區夫曰非也若見費人寒者衣之饑者食之為之令主而供其乏困費來如歸南氏亡矣民將叛之誰與居邑若憚之以威懼之以怒民疾而叛為之聚也若諸侯皆然費人無歸不親南氏將焉入矣平子從之費人叛南氏

蜀時關羽圍魏樊城留兵將備公安及南鄭郡吳將呂

蒙襲之兵到南郡羽下將糜芳降蒙入據城盡得羽及將士家屬皆撫慰約令軍中不得干歷人家有所求取蒙麾下士是汝南人取民家一笠以覆官鎧官鎧雖是公事蒙猶以為犯軍令不可以鄉里故而廢法遂垂涕斬之於是軍中震慄道不拾遺旦暮使親近存恤耆老問所不足疾痛者給醫藥饑寒者賜衣糧羽府藏財寶皆封閉以待孫權至羽還在道路數使人與蒙相聞蒙輒厚遇其使周城中家家致問或手書示信羽人還私相

叅訊咸知家門無恙見待過於平時故羽吏士無間心
會權尋至羽自知孤窮乃走麥城西至漳鄉衆皆委羽
而降權

晉羊祜都督荊州諸軍率營兵出鎮南夏開設庠序綏
懷遠近甚得江漢之心與吳人開布大信降者欲去皆
聽之吳石城守去襄陽七百餘里每為邊害祜患之竟
以詭計令吳罷守於是戍邏減半分以墾田八百餘頃
大獲其利祜之始至也軍無百日之糧及至季年有十

年之蓄祐以孟獻營武牢而鄭人懼晏弱城東陽而萊子服乃進據險要開建五城收膏腴之地奪吳人之資石城以西盡為晉有自是降者前後不絕乃增修德信以懷柔初附將帥有欲進譎詐之策者輒飲以醇酒使不得言有畧吳二兒為俘者祐遣送還其家後吳將夏詳等來降二兒之父亦率其屬與俱吳將陳尚潘景來寇祐追斬之美其死節而高之厚加殯斂景尚子弟迎喪祐以禮遣還吳將鄧香掠夏口祐募生縛香既至宥之

香感其恩率部曲而降祐出軍行吳境刈穀為糧皆計
所侵送絹償之每會衆江沔遊獵常止晉地若禽獸先
為吳人所傷而為晉兵所得者皆封還之於是吳人翕
然悅服稱為羊公不之名也祐與陸抗相對使命交通
抗稱祐之德雖樂毅諸葛孔明不能過也抗嘗病祐饋
之藥抗服之無疑心人多諫抗抗曰羊祐豈醜人者時
談以為華元子反復見於今抗每復告其戍曰彼專為
德我專為暴是不戰而自服也

隋桂州人李光仕舉兵作亂隋將周法尚討之光仕帥
勒勁兵保白石洞法尚捕得其弟光畧光度大獲家口
其黨有來降附者輒以妻子還之居旬日降其數千人
法尚遣兵列陣以當光仕親率奇兵蔽林設伏兩陣始
交法尚馳擊其柵柵中人皆走散光仕大潰追斬之
岳飛攻賊李成將馬進賊駭亂退走飛使人呼曰不從
賊者坐吾不殺汝坐而降者八千餘人賊大敗

後漢更始初光武為蕭王定河北諸賊銅馬餘衆降封

其渠帥為列侯降者猶不自安光武知其意勅令各歸營勒兵乃自乘輕騎按行部陣降者皆相語曰蕭王推赤心置人腹中安得不投死乎由是皆服

隋絳郡賊柴保昌等有衆八萬煬帝令戶部尚書樊子蓋擊之子蓋深溝高壘不敢決戰有來歸首者不問多少必坑之由是莫敢降賊徒日盛連年不能克煬帝乃令唐高祖代之賊有來降者皆引致左右推赤心以待之人人自安願効死力其黨相謂曰我輩本無逆心徒

以政令嚴酷懼死為盜耳前後首者皆為子蓋所殺窮無所歸今唐公與人無隔恩意如此我輩知不死矣遂相率歸前後至者數萬人餘賊散走他郡

唐淮西既平裴度為節度招撫使蔡人大悅舊令途無偶語夜不然燭人或以酒食相過從者以軍法論度乃約法惟盜鬪殺外餘盡除其往來者不復以晝夜為限蔡之遺黎始知有生人之樂度以蔡卒為牙兵或以為反側之徒其心未安不可自去其備度笑而答曰吾受

命為帥元惡就擒蔡人即吾人也父老無不感泣

漢楚相持之際項羽擊陳畱外黃外黃不下數日降羽
悉令男子十五以上詣城東欲坑之外黃令舍人兒年
十三往說羽曰彭越強劫外黃外黃恐故且降待大王
大王至又坑之百姓豈有所歸心哉從此以東梁地十
餘城皆恐莫肯下矣羽然其言乃赦外黃當坑者而東
至睢陽聞之皆爭下

宋檀道濟為高祖北伐前鋒至洛陽凡拔城破壘俘四

千餘人議者謂應戮以為京觀道濟曰伐罪弔民正在今日皆釋而遣之於是戎夷感悅相率歸之者衆

唐懷安王孝恭討蕭銑銑降時諸將咸曰銑之將帥與官軍拒戰罪狀既重當籍沒其家以賞將士李靖曰王者之師義存弔伐百姓既受驅逼相戰豈其所願且犬吠非主豈容同叛逆之科此蒯通所以免大戮於漢祖也今新定荊郢宜弘寬大以慰遠近之心降而籍之恐非救焚拯溺之義但恐自此以南城鎮堅守不下非計

之善遂止江漢城邑聞之莫不爭下

唐元和中魏博義成軍送擒獲逆賊李師道下都知兵馬使夏侯澄等四十七人上並從釋放仍却赴遞送軍前驅使如緣父母猶在賊中或羸老疾病情切歸還者仍量事優給放去及澄等至行營賊覘知之潛相傳告由是叛徒皆感朝廷恩繼有降者

後漢初河南賊張步據齊地漢將耿弇討敗之步肉袒負斧鑕於軍門弇傳步詣行在所勒兵入據其城樹十

二郡旗時步衆尚十餘萬輜重七十餘兩弁令降軍各以郡人詣旗下皆罷遣軍人令歸鄉里齊地悉平

後魏末河北賊葛榮為魏將爾朱榮所擒餘衆悉降榮以賊徒既衆若即分割恐其疑懼或更結聚乃下令各從所樂親屬相隨任所居止於是羣情喜悅兵即四散蜀諸葛亮南征所在戰捷聞孟獲者為夷漢所服募生致之既得之使觀營陣之間問曰此軍何如對曰向者不知虛實故敗今蒙賜觀營陣若祇如此即易勝耳亮

笑縱使更戰七縱七擒而亮又遣獲獲不去曰公天威也南人不復反矣遂至滇池南中悉平

陳祚明三年隋師濟江宜黃侯慧紀遣將呂肅據巫峽肅竭私財以充軍用隋將楊素奮兵擊之四十餘戰隋軍死者五千餘人陳人盡取其鼻以求功旣而隋軍屢捷獲陳之士三縱之肅乃遁走

唐太宗討薛仁果率左右二千餘騎追奔直趣折墪以乘之仁果列陣城下太宗據涇水以臨賊陣賊徒氣沮

無敢進戰其驍將渾幹等數人臨陣來降請還取馬太宗遣之於是各乘良馬須臾並至

唐高仁厚為西川押牙是時中官田令孜同父兄陳敬瑄為西川節度敬瑄多遣人歷縣鎮調事謂之尋事人所至多所求取有二人過資陽鎮獨無所求鎮將謝弘讓邀之不至自疑有罪夜亡入羣盜中明旦二人去弘讓實無罪也捕盜使楊遷因其自首而執以送使去討擊擒獲以求功敬瑄不之問杖弘讓脊二十釘西城二

七日煎油滌之又以膠麻掣其瘡備極慘酷見者寃之
又有邛州牙官阡能因公事違期避杖亡命為盜楊遷
復誘之能方出首聞引讓之寃大罵楊遷發憤為盜驅
掠良民不從者舉家殺之踰月衆至萬人立部伍署職
級橫邛雅二州間攻陷城邑所過塗地先是蜀中少盜
賊自是紛紛競起州縣不能制敬瑄遣牙將楊行遷等
三帥各將三千人以討之阡能黨愈熾浸淫入蜀州境
陳敬瑄以楊行遷等久無功以仁厚為都招討指揮使

將兵五百人往代之未發前一日有鬻麵者自旦至午
出入營中數回邏者疑之執而訊之果阡能之謀也仁
厚命釋縛溫言問之對曰某村民阡能因其父母妻子
於獄云汝詞事歸得實則免汝家不然盡死某非二溺
也仁厚曰誠知汝如是我何忍殺之今縱汝歸救汝父
母妻子但語阡能云高尚書來日發所將止五百人無
多兵也然我救汝一家汝當為我潛語寨中人云僕射
愍汝曹皆良人為盜賊所制情非得已尚書欲拯救湔

洗汝曹尚書來汝曹各投兵迎降尚書當使人書汝背
為歸順即遣汝復舊業所欲誅者阡能羅渾擎句胡僧
羅夫子韓求五人耳必不使橫及百姓也諜曰此皆百
姓心上事尚書盡知而赦之其誰不舞躍聽命一口傳
百百傳千川騰海沸不可遏也比尚書之至百姓必盡
奔走如嬰兒之見慈母阡能孤居立成擒矣遂遣之仁
厚引兵發至雙流把截使白文現出迎仁厚周視塹柵
怒曰阡能役夫其衆皆耕民耳竭一府之兵歲餘不能

擒今觀塹柵重複牢密如此宜其可以安眠飽食養寇
邀功也命引出斬之監軍力救久之乃得免命悉平柵
塹纔畱五百兵守之餘兵悉以自隨又召諸寨兵相繼
皆集阡能聞仁厚將至遣羅渾擎立五寨於雙流之西
伏兵千人於野橋箐以邀官軍仁厚詢知引兵圍之下
令勿殺遣人釋戎服入賊中告諭如昨日所以語謀者
賊大喜呼譟爭棄甲投兵請降拜如摧山仁厚悉撫諭
書其背使歸語寨中未降者寨中餘衆爭出降渾擎狼

猥踰塹走其衆執以詣仁厚仁厚曰此愚夫不足與語
械以送府悉命焚五寨及其甲兵惟畱旗幟所降凡四
千人明旦仁厚謂降者曰始欲即遣汝歸而前途諸寨
百姓未知吾心或有憂疑藉汝曹為我前行過穿口
新津寨下示以背字告諭之比至延貢可歸矣乃取渾
擎旗倒繫之每五十人為隊授以一旗使前走揚旗疾
呼曰羅渾擎已生擒送使府大軍行至汝輩居寨中者
速如我出降立得為良民無事矣至穿口句胡僧置十

一寨寨中人爭出降胡僧大驚拔劍遏之衆投瓦石擊之共擒以獻仁厚其衆五千餘人皆降又明日焚寨使降者執旗先驅一如雙流至新津韓求置十三寨皆迎降求自投深塹其衆鉤出之已死斬首以獻將士欲焚寨仁厚止之曰降人皆未食先運出資糧然後焚之新降者競炊爨與先降來告者共食之語笑歌吹終夜不絕明日仁厚縱雙流穿口降者先歸使新津降者執旗先驅且曰入邛州境亦可散歸矣羅夫子置九寨於延

貢其衆前夕望新津火光已不眠矣及新津人至羅夫子脫身棄寨奔阡能其衆皆降明日羅夫子至阡能寨與之謀悉衆決戰計未定日向暮延貢降者至阡能羅夫子走馬巡寨欲出兵衆皆不應仁厚引兵連夜逼之明旦諸寨知大軍已近呼譟爭出執阡能阡能窘急赴井為衆所擒不死又執羅夫子羅夫子自剄衆繫羅夫子首縛阡能驅之前迎官軍詣仁厚擁馬首大呼泣拜曰百姓負冤日久無所控訴自譟者還百姓引領度頃

刻如期年今遇尚書如出九泉睹白日已死而復生矣
謹呼不可止賊寨在他所者分遣諸將徃降之仁厚出
軍凡六日五賊皆平每下縣鎮輒補鎮遏使使安集戶
口於是陳敬瑄梟韓求羅夫子首於市釘阡能羅渾擎
句胡僧於城西七日而高之阡能孔目官張榮本安仁
進士屢舉不中第歸於阡能為之謀主為草書檄阡能
敗以詩啟求哀於仁厚仁厚送府釘於馬市自餘不戮
一人以仁厚為州防禦使

殺降

周世宗征淮南留鎧甲千數在正陽而得降卒八百部
送歸京師時曹翰適從京師來詣過正陽十數里許遇
之慮劫兵器為叛矯殺之及見世宗具言其事世宗不
悅翰曰賊以困歸我非心服也所得器甲盡在正陽苟
為所劫是復生一淮南矣因不之罪

用間

春秋時楚師伐宋九月不服將去宋楚大夫申叔時僕

曰築室反耕者宋必聽命楚子從之宋人懼使華元夜入楚師登子反之牀而起之曰寡君使元以病告曰敝邑易子而食析骸而爨雖然城下之盟有以國斃不能從也去三十里惟命是聽子反懼與之盟而告王退三十里宋及楚平華元若不因間諜無由得入楚軍

魏公子無忌安釐王時為信陵君不以富貴驕人公子與魏王博而北境傳舉烽言趙寇至且入界王釋博欲召大臣謀公子曰趙王田獵耳非為寇也復博如故王

恐心不在博居頃復從北方來言趙王獵耳非為寇也
王大驚問公子何以知之公子曰臣之客有能探得趙
王陰事者趙王所為輒以報臣臣以此知之

反間

趙奢為趙將秦伐韓軍於閼與趙王令趙奢將兵救之
兵去邯鄲三十里而令軍中曰有以軍事諫者死秦軍
軍武安西秦軍鼓譟勒兵武安屋瓦盡振軍中候有一
人言急救武安趙奢立斬之堅壁畱二十八日不行復

益增壘秦間來奢善食而遣之間以報秦將秦將大喜
曰夫去國三十里而軍不行乃增壘閑與非趙地也奢
既已遣秦間乃卷甲而趨之大破秦軍秦軍解而走遂
解閑與之圖而歸

唐朱泚反將吏自賊中逃來者言泚衆攜離可滅之狀
會賊將姚令言偽中丞崔宣使諜覘我軍為邏騎所得
拘送於李晟晟解縛食而遣之誠之曰爾報姚令言崔
宣善為賊守諸將勉力自固勿不忠於賊也

李愬討淮西舊軍令有舍賊謀者屠其家愬除其令因使厚之謀反以情告愬愬益知賊中虛實

燕使樂毅伐破齊齊湣王出奔已而保莒城燕師長驅平齊田單東走保即墨即墨大夫出戰敗死城中相與推田單為將軍以即墨拒燕頃之燕昭王卒惠王與樂毅有隙單聞之乃縱反間於燕宣言曰齊王已死城之不拔者二耳樂毅畏誅而不敢歸以伐齊為名實欲連兵南面而王齊齊人未附故且緩攻即墨以待其事齊

人所懼惟恐他將之來即墨殘矣燕王以為然使騎劫代樂毅樂毅因歸趙單又宣言曰吾惟懼燕軍之剽所得齊卒置之前行與我戰燕人聞之如其言城中人見齊諸降者皆剽皆怒堅守惟恐見得又縱反間曰吾懼燕人掘吾城外塚墓僇辱先人燕軍盡掘葬墓燒死人即墨人從城望見皆涕泣單又收民金得千鎰令即墨富豪遺燕將曰即墨即降願無虜掠吾族家妻妾令安堵燕將大喜許之燕軍由此益懈單乃鑿城夜縱火牛壯

士鼓譟出擊燕軍大駭敗走所亡七十餘城皆復

范雎為秦昭王相使右庶長王齕攻韓取上黨上黨民走趙趙軍長平齕因攻趙趙使廉頗堅壁以待秦秦數挑戰趙兵不出趙王數以為讓而雎使人行千金於趙為反間曰秦之所惡獨畏馬服子趙括將耳廉頗易與且降矣趙王既怒廉頗軍多失亡軍數敗又反堅壁不敢戰而又聞秦反間之言因使趙括代廉頗將以擊秦秦聞馬服子將乃以武安君白起為將軍秦軍射殺趙

括括軍敗卒四十萬人降武安君武安君乃挾詐而盡坑殺之

唐劉世讓拜廣州總管將之任高祖問以備邊之策世讓答曰突厥南寇徒以馬邑為其中路耳如臣所計請於崞城置一智勇之將多儲金帛有來降者厚賞賜之數出奇兵略其城下芟踐禾稼敗其生業不出歲餘彼當無食馬邑不足圖也高祖以無可任者乃使世讓馳驛往經略之突厥懼其威名乃縱反間言世讓與可汗

通謀將為亂高祖不之察遂誅世讓

使間

前漢陳平初為漢王護軍中尉項羽圍漢王於滎陽城漢王患之請割滎陽以西和項王弗聽平曰顧楚有可亂者彼項王骨鯁之臣亞父鍾離昧龍且周殷之屬不過數人耳大王能出捐數萬斤金行反間間其君臣以疑其心項王為人意忌信讒必內相誅漢因舉兵而攻之破楚必矣漢王以為然乃出黃金四萬斤與平恣所

為不問出入平既多以金縱反間於楚軍宣言諸將鍾離昧等為項王將功多矣然終不得裂地而王欲與漢為一以滅項氏分王其地項王果疑之使使至漢漢為太牢之具舉進見楚使來即陽驚曰吾以為亞父使乃項王使也復持去以惡草具進楚使使歸具以報項王果大疑亞父亞父欲急擊下滎陽項王不信不肯聽亞父亞父聞項王疑之乃大怒疽發背而死卒用計滅楚唐長孫晟為奉車都尉以突厥攝圖玷厥阿波突利等

各倚強兵難以力征易可離間因上書陳突厥強弱形勢高祖皆納用乃遣太僕元暉出伊吾道使詣玷厥賜以狼頭纛謬為欽敬禮甚優玷厥使來引居攝圖使上反間既行果相猜貳授晟車騎將軍出黃龍道賫幣賜奚霫契丹等遣為鄉導得至處羅侯所深布心腹誘令內附攝圖四千萬騎自蘭州入至於周盤破達奚長孺軍更欲南入玷厥不從引兵而去

鄉間

李達為都督義州弘農等二十一州諸軍事每厚撫境
外之人使為間諜敵中動靜必先知至有事泄被誅戮
者亦不以為悔其得人心如此

後周韋孝寬為南兖州刺史東魏將段琛堯傑據宜陽
遣其揚州刺史牛道常扇誘邊民孝寬深患之遣謀人
訪獲道常手跡令善作書者偽作道常與孝寬書論歸款
意又為落燼燒迹若火下書者還令諜人送於琛營琛
得書果疑道常其所欲經略皆不見用孝寬知其離阻

因出奇兵掩襲擒道常及琛等崤澠遂清後孝寬為驃騎大將軍鎮玉壁孝寬善於撫御能得人心所遣間諜入齊者皆為盡力亦有齊人得孝寬金貨遙通書疏故齊人動靜朝廷皆先知時有主帥許盆孝寬託以心膂令守一城盆乃以城東入孝寬怒遣諜取之俄而斬首而還其能致人情如此

內間

秦王翦為將攻趙趙使李牧司馬尚禦之李牧數破走

秦軍殺將桓齮翦惡之乃多遺趙王寵臣郭開等金使
為反間曰李牧司馬尚欲與秦反趙以多取封於秦趙
王疑之使趙葱及顏聚代將斬李牧廢司馬尚後三月翦
因急擊趙大破殺趙葱虜王遷及其將顏聚遂滅趙

後周常孝寬為將軍北齊將斛律光在汾北孝寬忌光
英勇乃作謠言令間諜漏其文於鄴曰百升飛上天明
月照長安光字明月又曰高山不推自崩檟木不扶自
立齊臣祖珽穆提婆與光有隙因續之曰盲老翁背上

受大斧饒舌老母不得語令小兒歌之於路提婆聞之
以告後主乳母陸令萱以饒舌斥已盲老翁謂祖珽也
遂相與協謀以謠言啟後主謀誅光武帝聞之始有滅
齊之意竟平其國

吳孫權命呂蒙西取長沙零桂三郡蒙移書二郡望風
歸服惟零陵太守郝普城守不降而劉備自蜀親至公
安遣關羽爭三郡權時住陸口使魯肅萬人屯益陽拒
羽而飛書召蒙急還助肅蒙既定長沙當之零陵南陽

鄧玄之者郝普之舊也欲令誘普及被書當還蒙秘之夜召諸將授以方略晨當攻城顧謂玄之曰郝子泰聞世有忠義事亦欲為之而不知時也左將軍在漢中為夏侯淵所圍關公在南郡至尊身自臨之近者破樊本屯救鄆逆為孫規所破彼方首尾倒垂救死不給豈有餘力復營此哉今吾士卒精銳人思致命至尊遣兵相繼於道曾不移日而城必破城破之後身死何益於事而今百歲老母戴白受誅豈不痛哉蒙度此家不得外

問謂援可恃故至於此耳君可見之為陳禍福玄之見
普具宣蒙意普懼聽之玄之先出報蒙普尋後當至蒙
豫勅四將各選百人普出便入守城門須臾普出蒙迎
執其手與下船語畢出書示之因拊手大笑普見書知
備在公安而羽在益陽慙恨入地

死問

戰國鄭武公欲伐胡先以其子妻胡因問羣臣曰吾欲
用兵誰可伐者大夫關其思曰胡可伐武公怒而戮之

曰胡兄弟之國子言伐之何也胡君聞之以鄭為親已
不備鄭襲胡取之

漢高祖時齊王田廣軍厯下以拒漢漢使酈食其往說
之與連和廣然之乃罷厯下守備縱酒且遣使與漢平
韓信渡平原襲破齊齊王烹酈生

南齊東昏侯遣輔國將軍劉山陽為巴西太守配兵三
千使過荊州就行事蕭穎胄兵襲蕭衍衍時為雍州刺
史將起兵慮穎胄不同遣穎胄親人參軍王天虎徧與

州府書詣江陵聲云山陽西上并襲荊雍書與潁冑
勸同舉兵潁冑意猶未決及山陽西上梁武謂諸將曰
荊州本畏襄陽又加以唇亡齒寒自有傷弦之急寧不
闇同耶我若總荊州之兵掃定東夏韓白重出不能為
計況以無算之昏主哉我能使山陽至荊州便即授首
諸君試觀何如及山陽至巴陵梁武復命天虎齋書與
潁冑兄弟去後梁武謂張弘策曰夫用兵之道攻心為
上攻城次之心戰為上兵戰次之今日是也先遣天虎

往州府人皆有書今次乘驛甚急止有兩封與行事兄弟云天虎口具及問天虎而口無所說行事不得相聞不容妄有所道天虎是行事心齊聞必謂行事與天虎共隱其事必人人人生疑山陽惑於衆口迭相嫌貳則行事進無以自明必恐漏吾謀內是馳兩空函定一州矣是時或云山陽謀殺潁冑以荊州同舉及至江安聞之果疑遲回十日餘不上潁冑大懼計無所出夜呼主軍席闡文柳沈閉閣定議闡文曰蕭雍州蓄養士馬非復

一日江陵素畏襄陽人又衆寡不敵取之必不可制就能制之歲寒復不為朝廷所容今若殺山陽與雍州舉事立天子以令諸侯霸業成矣山陽遲疑不進是不信我今斬送天虎則彼疑可釋至而圖之罔不濟矣詰旦潁冑謂天虎曰天下之事縣在於卿今就借頭以詐山陽昔樊於期亦以頭借荊軻乃斬天虎以示山陽山陽大喜至江津單車白服率左右數十人詣潁冑潁冑使劉孝慶等伏兵城內山陽入門即於車中斬之

貞觀初突厥頡利可汗退保鐵山遣使入朝謝罪請為藩臣太宗遣唐儉安修仁持節出塞以安撫之以李靖為定襄道總管徃利頡利不肯朝覲請待草青馬肥將踰砂磧靖與其副將張公謹謀曰制使到彼虜必自寬率精騎齎二十日糧乘間掩襲諸將皆曰詔許其降行人在彼奈何攻之靖曰此兵機也如唐儉等輩何足惜督軍疾進自白道襲之至陰山遇其斥候千餘帳皆俘以隨軍頡利見使者甚悅不虞官兵之至靖軍奄

到縱擊之遂滅其國

韓世忠值是歲金人與劉豫合兵分道入侵帝手札命世忠飭守備圖進取辭旨懇切世忠受詔感泣曰主憂如此臣子何以生為遂自鎮江濟師俾統制解元守高郵候金步卒親提騎兵駐大儀當敵騎伐木為柵自斷歸路會遣魏良臣使金世忠撤炊爨給良臣有詔移屯守江良臣疾馳去世忠度良臣已出境即上馬令軍中曰眦吾鞭所嚮於是引軍次大儀勒五陣設伏二十餘

所約聞鼓即起擊良臣至金軍中金人問王師動息具
以所見對聶嘒貝勒聞世忠退喜甚引兵至江口距大
儀五里別將托卜嘉擁鐵騎過東世忠傳小麾鳴鼓伏兵
四起旗色與金人旗雜出金軍亂我軍迭進背嵬軍各
持長斧上堪人脊下斫馬足敵被甲陷泥淖世忠麾勁
騎蹂躪人馬俱斃遂擒托卜嘉等二百餘人所遣董敗
亦擊金人於天長縣之鵝口擒女真四十餘人解元至
高郵遇敵設水軍夾河陣日合戰十三相拒未決世忠

遣成閔將騎士往援復大戰俘生女真及千戶等世忠
復親追至淮金人驚潰相蹈藉溺死甚衆捷聞羣臣入
賀帝曰世忠忠勇朕知其必能成功論者以此舉爲中
興武功第一時達喇屯泗州烏珠屯竹塾鎮爲世忠所扼
以書幣約戰世忠許之時方宴會使兩伶人以橘茗報
聘會雨雪金饋道不通野無所掠殺馬而食蕃漢軍皆
怨烏珠夜引軍還劉麟劉猷棄輜重遁

五代梁朱溫以岐人堅壁不戰且慮師老思欲旋旆以

歸河中因密召上將數人語其事時親指揮使高季昌獨前出抗言曰天下雄傑窺此舉者一歲矣今歧人已困願少俟之溫嘉其言因曰兵法以正合以奇勝奇者詐也乘機集事必由是乎乃命季昌密募人入歧以紿之尋有騎士馬景堅願應命且曰是行也必無生理願錄其孥溫悽然立止其行景固請乃許之明日軍出諸砦屏匿如無人景因躍馬西走直叩岐闥詐以梁軍悉東遁為告且言列砦尚留萬餘人俟夕將遁矣宜速掩

之茂真信其言遽啟二扉悉衆來寇時諸軍已介馬待之中軍一鼓百營俱進又分遣數百騎以據其闌歧人進不能駐其趾退不能入其壘殺戮蹂踐不知其數茂真由是喪膽但閉壘而已

揚州牧羅尚遣隗伯攻蜀賊李雄於郫城互有勝負雄乃募武都人朴泰鞭之見血使譎羅尚欲為內應以火為期尚信之悉出精兵遣隗伯等率兵從泰擊雄雄將李讓於道設伏泰以長梯倚城而舉火伯軍見火起而

爭緣梯泰又以繩汲上軍百餘人皆斬之雄因放兵內
外擊之大破尚軍

生間

种世衡居西邊始元昊寇邊王師屢撓虜之氣焰益張
常有并吞關中之意其將剛浪陵號野利王某號天都
王元昊倚為心腹凡勝我軍皆二將之策也世衡方城
青澗謀有以去之有王嵩者本青澗僧世衡察其堅朴
誘令冠帶因出師以賊級予之白於帥府表授三班借

職充經畧司指使且力為辦其家事凡居室騎從衣食之具悉出世衡嵩感激既深世衡反不禮以奴畜之或掠治械繫數日嵩雖不勝其苦卒無一辭望世衡世衡知可任兵事居半年召嵩謂之曰吾將以事使汝吾戒汝所不言其苦雖有甚於此者汝能為卒不言否嵩泣對曰蒙將軍恩教致身榮顯常誓以死報而未知其所況敢辭捶楚乎世衡乃草遺野利書書辭大抵如世間問起居之儀惟以數句隱辭如嘗有私約而勸其速行

之意書於尺素且膏以蠟置衲衣間密縫之告嵩非濱死不得泄如泄之當以負恩不能成吾事為言并以畫龜一副棗一部為信俾遺野利嵩受教至野利所以將軍命出棗龜投之野利知見侮笑曰吾素竒种將軍今何女子見識度嵩別有書嵩佯目左右既而答以無有野利不敢匿乃封其信上元昊數日元昊召野利與嵩俱西北行數百里至一大城曰興州先詣一官寺曰樞密院次曰中書有數胡人雜坐野利與焉召嵩廷詰將

軍書問所在堅執前對稍稍去巾櫛加執縛至於捶楚
極苦嵩終不易其言又數日召入一官走廳事廣楹皆
垂班竹箔綠衣小豎立其左右嵩意元昊宮室也少頃
箔中有人出又以前問責之曰若速言死矣嵩對如前
乃命曳出斬之嵩大號且言曰始將軍遣嵩密遺野利
王書戒不得妄泄今不幸空死不了將軍事吾負將軍
吾負將軍箔中急使人追問之嵩具以對乃褫衲衣取
書以進書入移刻始命嵩就館優待以禮元昊於是疑

野利陰遣愛將假為野利使使於世衡世衡知元昊所遣未即見命屬官日館勞之問虜中山川地形在興州左右言則詳迫野利所部多不能悉適擒生虜數人因令隙中視之生虜能言姓名果元昊使世衡意決乃見之使者傳野利語世衡慢罵元昊而稱野利有心內附乃厚遣使者曰為我語若王速決無遲留也度使者至嵩即還而野利已報死矣世衡知謀已行因欲弇間天都又為置祭境上作文書於版以弔多述野利與天都

相結有意本朝悼其垂成而失其文雜紙幣伺有虜至
急焚之以歸版字不可遽滅虜人得之以獻元昊天都
以此亦得罪元昊既失二將久之始悟為世衡所賣遂
定講和之策焉一云元昊之臣野利常為謀主守天都
山號天都大王與元昊乳母白姥有隙歲除日野利引
兵巡邊深涉漢境數宿白姥乘間乃譖其欲叛元昊疑
之世衡嘗獲蕃猶之子蘓吃曩厚遇之聞元昊嘗賜野
利寶刀而吃曩之父得幸於野利世衡因使吃曩竊野

利刀許之以緣邊職任錦袍真金帶吃曩得刀以還世
衡乃唱言野利已為白晁譖死設祭境上為祭文叙歲
除日相見之歡入夜乃火燒紙錢川中盡明虜見火光
引騎近邊窺覘乃佯委祭具而銀器凡千餘兩悉棄之
虜人爭取器皿得元昊所賜刀及火爐中見祭文已燒
盡但存數十字元昊得之又識其所賜刀遂賜野利死
野利有大功死不以罪自此君臣猜貳以至不能軍

俘問

春秋時楚子反命軍吏察夷傷補卒乘繕甲兵展車馬
鷄鳴而食惟命是聽晉人患之苗賁皇徇曰蒐乘補卒
秣馬利兵修陳固列蓐食申禱明日復戰乃逸楚囚王
聞之召子反謀穀陽豎獻飲於子反醉而不能見王曰
天敗楚也夫余不可以待乃宵遁

後漢光武初遣耿弇征張步步聞之乃使大將費邑軍
厯下分兵屯祝阿別於太山鍾城列營數十以待弇弇
兵先擊祝阿自旦攻城未中而拔之故開一角令其衆

得奔歸鍾城聞祝阿已潰空壁亡去費邑遣弟守拒里
奔進軍先脅巨里使揚言多伐林木以填塞扼塹數日
有降者言邑聞奔欲攻巨里謀來救之奔嚴令軍中趣
修攻具後三日當悉力攻巨里陰緩生口令亡歸歸者
告邑邑將精兵三萬來救奔曰吾修攻具者欲誘致邑
耳今適其所求也大敗之

班超在西域發于闐諸國兵擊莎車而龜茲王遣兵五
萬令溫宿王救之超召將校及于闐王議曰今兵少不

敵其計莫若散去于闐從是而東超亦於此西歸可須
夜鼓而發陰縱所得生口歸以超言告龜茲王王聞之
大喜自以萬騎於西界遮超溫宿王將八千騎於東界
邀於闐超知二虜已出密召諸部勒兵鷄鳴馳赴莎車
營胡大驚亂奔走追斬五千級自是威鎮西域

河北賊葛榮別帥韓婁等有衆數萬人屯據薊魏將侯
淵率騎七百討之去薊百餘里值賊帥陳周馬步萬餘
衆遂潛伏以乘其背大破之擄其卒五千餘人尋還其

馬伏縱令入賊城左右諫曰既獲何為更資遣之淵曰
我兵既少不可力戰事須為計以離間之淵度其已至
遂帥衆夜進昧朝即其城門韓婁果疑降卒為之內應
遂遁走追擒之

杜預為鎮南大將軍都督荊州至鎮繕兵甲耀威武乃
簡精銳襲吳西陵督張政大敗之政吳之名將也據要
害之地恥以無備取敗不以所喪之實告於孫皓預欲
間吳邊將乃表還其所獲之衆於皓皓果召政遣武昌

監劉憲代之故大軍臨至使其將帥移易以成傾蕩之勢

岳飛知劉豫結尼雅滿而烏珠惡劉豫可以間而動會軍中得烏珠謀者飛陽責之曰汝非吾軍中人張斌耶吾向遣汝至齊約誘致四太子汝往不復來吾繼遣人問齊已許我今冬以會合寇江為名致四太子於清河汝所持書竟不至何背我耶謀冀緩死即詭服乃作蠟書言與劉豫同謀誅烏珠事因謂謀曰吾今貸汝復遣至

齊問舉兵期封股納書戒勿泄諜歸以書示烏珠烏珠大驚馳白其主遂廢豫

岳飛時李成亂湖南飛奏比年多命招安故盜力強則肆暴力屈則就招苟不畧加勦除蠱起之衆未可遽殄許之飛入賀州境得成諜者縛之帳下飛出帳調兵食吏曰糧盡矣柰何飛陽曰姑反茶陵已而顧諜若失意狀頓足而入陰令逸之諜歸告成大喜期翼日來追飛命士蓐食潛趨遠嶺未明已至太平場復破其砦成

據險拒飛飛麾下兵掩擊賊大潰成走據北藏嶺上梧
關遣將迎戰飛不陣而鼓士爭奮奪二險據之成又自
桂嶺置砦至北藏嶺連控隘道親以衆十餘萬守蓬頭
嶺飛部纔八千一鼓登嶺破其衆成奔連州飛謂張憲
等曰成黨散去追而殺之則脇從者可憫縱之則復聚
為盜今遣若等誅其首而撫其衆慎勿妄殺累主上保
民之仁於是憲自賀連徐慶自邵道王貴自郴桂招降
二萬與飛會連州進兵追成成走宣撫司降

岳飛相有劇賊陶俊賈進和飛請百騎滅之遣卒偽為
商入賊境賊掠以充部伍飛遣百人伏山下自領數十
騎逼賊壘賊出戰飛陽北賊來追之伏兵起先所遣卒
擒俊及進和以歸

漏間

吳陸遜為大將軍右都護鎮荊州時魏江夏太守逢式
兼領兵馬頗作邊害而與北舊將文聘子休宿不協遜
知其然即假作荅式書云得報懇惻知與休久結嫌隙

勢不兩存欲來歸附輒以密呈來書表聞選衆相迎宜
潛速嚴更示定期以書置界上式兵得書以見式式惶
恐遂自送妻子還路由是吏士不相親附遂以免罷

李矩為河東太守劉聰遣從弟暢討矩矩選勇敢千人
夜掩暢營暢僅以身免先是聰使其將趙固鎮洛陽長
史周振與固不協密陳固罪矩之破暢也帳中得聰書
勅暢平矩訖過洛陽收固斬之便以振代固矩送以示
固固即斬振父子遂率騎一千來降矩還令守洛

欽定四庫全書

武編後集
卷二

四

蜀將孟達降魏魏朝遇之甚厚司馬宣王以達言行傾巧乃以達為新城太守達於是連吳固蜀潛圖中國蜀諸葛亮惡其反覆又惡其為患達與魏興太守申儀有隙亮欲促其事乃遣郭謨詐降過儀因漏泄其謀達聞其謀漏泄乃欲舉兵

不信問

曹王皐鎮江西先是牙將伊慎討梁崇義摧鋒陷敵李希烈意欲繫之慎以計遁歸皐始至鍾陵大集將吏得

慎而壯之拔為大將繕理舟師希烈懼慎為曹王所任
乃遣慎七屬之甲詐為慎書行間焉德宗遣中使即軍
中詰之臯乃抗疏論雪上章未報會賊兵泝江來寇臯
乃召慎勉之令戰大破二千餘衆朝廷始信其不二

諜間

春秋時子罕為宋司城陽門之介夫死子罕入而哭之
哀晉人之覘宋者反報於晉侯曰陽門之介夫死而子
罕哭之哀而民說殆不可伐也孔子聞之曰善哉覘國

乎詩云凡民有喪扶服救之雖微晉而已天下孰能當之

楚子元為楚令尹以車六百乘伐鄭入桔扶之門諸侯救鄭楚師夜遁鄭人將奔桐邱諜告曰楚幕有烏乃止

晉師伐齊齊侯畏衆齊師夜遁師曠曰烏烏之聲樂齊師其遁邢伯曰有班馬之聲齊師其遁叔向曰城上有烏齊師其遁

察間

秦伐晉取羈馬晉師禦之出戰交綏秦行人夜戒晉師
曰兩軍之士皆未愁也明日請相見也晉大夫史駢曰
使者目動而言肆懼我也將遁矣薄諸河必敗之胥甲
趙穿當軍門呼曰死傷未收而棄之不惠也不待期而
薄人於險無勇也乃止秦師夜遁

晉侯將伐鄭鄭人聞有晉師使告於楚姚句耳與往楚
子救鄭司馬將中軍令尹將左右尹子辛將右姚句耳
先歸子駟問焉對曰其行速過險而不整速則失志不

整喪列志失列喪將何以戰楚果敗

智伯從韓魏之兵以攻趙圍晉陽之城而溉之城不沒者三版絺疵謂智伯曰韓魏之君必反矣智伯曰何以知之絺疵曰夫勝趙而三分其地今城未沒者三版沈竈生鼃人馬相食城降有日矣而韓魏之君無喜志而有憂色是非反何也明日智伯謂韓魏之君曰疵言君之反也韓魏之君曰夫勝趙而三分其地今城將勝矣夫二家雖愚不棄美利而倍約為難不可成之事其勢

可見矣是疵必為趙說君且使君疑二主之心而解於
攻趙也今君聽讒臣之言而離二主之交為君惜之智
伯欲殺絺疵絺疵逃韓魏之君果反

魏張遼圍昌豨於東海數月糧盡議引軍還曰數月以
來每行諸圍豨輒屬目視遼又射矢更豨此必豨計猶
豫故不力戰遼欲挑與語儻可誘也乃使謂豨曰公有
命使遼傳之豨果下與遼語遼曰太祖神武先附者受
大賞豨乃降遼入豨家拜妻子豨歡喜隨詣太祖

後涼呂光將呂延伐乞伏乾歸大破之乾歸乃縱反間稱衆潰東奔成紀延信而追之延司馬耿雅曰告者視高而色動必有奸計不可信也延不從相遇戰敗死之金將伊都遼人耶律烏舍之降金以為西軍之監軍久不遷常怏怏其軍哈勒津伊實其金牌大金疑其與林牙暗合遂質其妻子伊都有叛心約燕京統軍反統軍之兵皆契丹人伊都謀誅西軍之在雲中者盡約雲中河東河北燕京郡守之契丹漢兒令誅女真之在官在軍

者天德知軍偽許之遣其妻來告時烏舍為西監軍自雲中來燕微聞其事而未信回行數百里因獵居庸之東遙見二騎馳遞交相遇於道立馬久談久而不去烏舍疑之命數騎追二人至詰曰爾何人也曰伊都使者以軍事詣燕山考里統軍司考里亦契丹烏舍曰爾等適立馬話及何事曰問候烏舍曰非也問候之語無許久又曰話別烏舍曰亦非也話別之語無許久又曰叙家事烏舍曰家事故非立馬叙又曰叙往事烏舍曰往

事亦非立馬叙馳者詞窮面顫又且戰慄不已烏舍察其言色兼素疑伊都考里皆契丹反覆之徒因以詐折之曰我知爾二人密議反者近有人密告伊都考里反期於今日各有使至我故來此伺果復得爾輩夫何隱焉其人謂烏舍果知不敢隱伊都之叛由是敗烏舍多計皆此類

隱語

春秋時楚師傳於蕭還無社與司馬卯言號申叔展叔

展曰有麥麴乎曰無有山鞠窮乎曰無河魚腹疾柰何
曰目於智井而拯之若為茅經哭井則已明日蕭潰申
叔視其井則茅經存焉號而出之

吳申叔儀乞糧於公孫有山氏曰佩玉藥兮余無所繫
之旨酒一盛兮余與褐之父晚之對曰梁則無矣麤則
有之若登首山以呼曰庚癸乎則諾

唐許欽明嘗出案部突厥默啜率衆數萬奄至城下欽
明拒戰久之力屈被執賊將欽明至靈州城下令說城

中早降欽明大呼曰賊中都無飲食城內有美醬乞二升梁米乞一斗墨乞一挺是時賊營處四面阻泥河惟一路得入欽明乞此物以喻城中冀其簡兵練將候夜掩襲城中無悟其旨者

伐交

魏牽招為烏桓中郎將上奏言諸葛亮數出而北虜軻比能控弦十餘萬騎狡猾能相交通表為防備議者以為縣遠未之信也會亮時在祁山果遣使連結比能至

故北地石城與相首尾帝乃詔招使從便宜討之時比
能已還漢南

沈法興既克毗陵謂江淮之南指揮可定自稱梁王都
毗陵時杜伏威據歷城陽陵據江都李子通據海陵俱
有窺江表之心法興軍數敗會子通圖稜於江都稜送
質求救於法興及伏威法興使其子綸將兵數萬與伏
威共救之伏威軍清流綸軍揚子相去數十里子通納
言毛文深獻策募江南人詐為綸兵夜襲伏威營伏威

怒復遣兵襲綸由是二人相疑莫敢先進子通得盡銳
攻江都克之稜奔伏威子通入江都因縱擊綸大破之
伏威亦引去

唐蘓定方討賀魯薛仁貴上疏曰臣聞兵出無名事故
不成明其為賊敵乃可服今泥熟杖素悍不服賀魯為
賀魯所破虜其妻子漢兵有於賀魯諸部落得泥熟杖
家口將克賤者宜括取送還仍加賜賚即是明其枉旋
使百姓知賀是賊知陛下德澤廣及也高宗然其言使

括泥熟家口悉送還之於是泥熟等請隨軍效死

唐德宗時朱泚朱滔王武俊兵反泚旣汧宮闕羣賊附
李希烈希烈僭號欲臣制諸叛衆心稍離自奉天下罪
已詔赦羣賊昭義帥李抱真先遣門客賈林以文義說
武俊合從擊泚武俊雖許之然尚猶豫抱真乃以數騎
徑入武俊營謂曰朱泚希烈僭竊大位足下不能自振
於數賊之間乃捨九葉天子而臣反虜乎因言及播越
抱武俊哭涕泗交下武俊亦哭感慟左右又於武俊帳

中酣寢久之武俊感其不疑結為兄弟而別明日合戰
大破朱滔

曹瑋在西陲西羌將舉事必先定約束號為立文法角
厮囉使其舅賞樣丹與厮敦立文法於離土族謀內寇
瑋陰結厮敦解寶帶予之厮敦感激求自效間謂瑋曰
吾父何所欲使欲吾首猶可斷以獻瑋曰我知賞樣丹
時至汝帳下汝能為我取賞樣丹首乎厮敦愕然應之
後十餘日果斷其首來

王韶詣闕上平戎策三篇其略以為西夏可取欲取西
夏當先復河湟則夏人有腹背受敵之憂夏人比年攻
青唐不能克萬一克之必併兵南向大掠秦渭之間牧
馬於蘭會斷古渭境盡服南山生羌西築武勝遣兵時
掠洮河則隴蜀諸郡當盡驚擾賄征兄弟其能自保耶
今唃氏子孫唯董氐粗能自立賄征欺巴溫之徒文法
所及各不過一二百里其勢豈能與西人抗哉武威之
南至於洮河蘭鄯皆故漢郡縣所謂湟中浩亶大小榆

抱罕土地肥美宜五種者在焉幸今諸羌瓜分莫相統
一此正可并合而兼撫之時也諸種旣服唃氏敢不歸
唃氏歸則河西李氏在吾股掌中矣且唃氏子孫瞻征
差盛為諸羌所畏若招諭之使居武勝或渭源城使糾
合宗黨制其部族習用漢法異時族類雖盛不過一延
州李士彬環州慕恩耳為國有肘腋之助且使夏人無
所連結策之上也

种師道知渭州督諸道兵城席葦土賦工敵至堅壁萌

蘆河師道陳於河澚若將決戰者陰遣偏將曲克徑出橫嶺揚言援兵至敵方駭顧楊可世潛軍衝其後姚平仲以精甲襲擊之敵大潰斬首五千級獲橐駝馬牛萬計其酋僅以身免卒城而還

合交

宋童貫謀伐燕使种師道盡護諸將師道諫曰今日之舉譬如盜入鄰家不能救又乘之而分其室焉無乃不可乎貫不聽既次白溝遼人譟而前士卒多傷師道先

令人持一巨梃自防賴以不大敗遼使來請曰女真之叛本朝亦南朝之所甚惡也今射一時之利棄百年之好結豺狼之鄰基他日之禍謂為得計可乎救災恤鄰古今通義惟大國圖之貫不能對師道復諫宜許之又

不聽密劾其助賊王黼怒責為右衛將軍致仕

宗澤上奏曰臣欲乘此暑月遣王彥等滑州渡河取懷衛濬相等州遣王再興等自鄭州直護西州陵寢遣馬度等自大名取洺相真定楊進王善丁進李貴等各以

所領兵分路並進既渡河則山寨忠義之民相應者不
啻百萬契丹兒亦必同心殲殄金人事方就緒乞朝廷
遣使聲言立契丹天祚之後講吾舊好以携敵情遣知
幾辯博之士西使夏東使高麗諭以禍福必出助兵同
加掃蕩如此則二帝有回鑒之期西河可以安帖矣願
陛下早下還京之詔臣當躬冒矢石為諸將先則我宋
中興之業必可立致若陛下以臣言為不可用望賜骸
骨放歸田里疏入黃潛善等忌澤成功從中沮之澤歎

曰吾志不得伸矣因憂鬱成疾

韓世忠移屯山陽遣間結山東豪傑約以緩急為應宿
州馬秦及太行羣盜多願奉約束者金人廢劉豫中原
震動世忠謂機不可失請全師北討招納歸附為恢復
計

岳飛令梁興等布德意招結兩河豪傑山砦韋銓等斂
兵固堡以待王師李通等舉衆來歸金人動息山川險
要一時皆得其實盡磁相開德澤潞晉絳汾隰之境皆

期日興兵與官軍會其所揭旗以岳為號父老百姓爭
挽車牽牛載糗糧以餽義軍頂盆焚香迎送候者充滿
道路

余靖言交趾乞會兵討賊而朝廷久未報智高交趾叛
者宜聽出兵毋阻其善意朝廷從其請狄青奏假兵於
外以除內寇非我利也以一智高橫蹂二廣力不能討
乃假兵蠻夷貪得忘義因而起亂何以禦之願罷交趾
兵勿用且檄靖無通交趾使朝廷卒用青計策人亦服

青有遠略云

攻

齊武平中周師來寇以段韶斛律光拒之行建西境有
栢谷城者敵之絕險古城千仞諸將莫肯攻圍韶曰汾
北河東世為國之有若不去栢谷事同痼疾計彼援兵
會於南道今斷其要路救不得來城勢雖高其中甚狹
火弩射之一旦可盡遂攻之城潰仍城華谷置戍而還
是月周又遣將攻邊斛律光先率軍禦之韶亦請行五

月到服秦城西仍於姚襄城南更起城鎮韶抽壯士襲之使人潛渡河告姚襄城中內外相應進戰大破之諸將欲攻其新城韶曰此城一面阻河三面地險不可攻不如更作一城壅其要道破服秦併力圖之從之從圍定陽屠其外城時韶病在軍中謂蘭陵王長恭曰此城三面重澗並無走路惟慮東面一處耳賊若突圍必從此出長恭乃設伏其夜果如策伏兵擊之大潰

唐侯君集伐高昌率兵至柳谷侯騎言其國王文泰尅

日將葬國人咸集諸將請襲之君集曰不可天子以高昌驕慢無禮使吾恭行天罰今襲人於壚墓之間非問罪之師也於是鼓行而前賊嬰城而守先是大軍之發也上召上東善為攻城器者悉遣從軍君集遂刊木填隍推撞車撞其睥睨拋車飛石擊其城中其所當者無不糜碎或張氈被用障拋石城上守睥者不復得立遂拔之虜其男女七十餘口仍進兵圍其都城

代宗時土蕃與諸雜羌寇陷西山柘靜等州詔嚴武

收復武遣崔旰統兵西山旰善撫士卒皆願致死命始
次賊城周圍皆石礮攻具無所設惟東南隅環丈之地
壤土可穴謀知之以告旰晝夜穿地道以攻之再宿而
拔其城因拓地數百里下城寨數四蕃衆相語曰崔旰
神兵也將更前進以糧盡還武大悅裝七寶輦迎旰入
成都以誇士衆

晉王存勗如魏州視河水已堅引步騎稍度梁甲士三
千戍陽劉城緣河數十里列柵相望晉王急攻皆陷之

進攻楊劉城使步卒斬其鹿角葭葦塞塹四面進攻即日拔之

孟珙翼日命諸將奪柴潭樓金人爭樓諸軍魚貫而上金人又飾美婦人以相盪麾下張禧等殺之遂拔柴潭樓俘其將士五百三十有七人蔡人恃潭為固外即汝河潭高於河五六丈城上金字號樓伏巨弩相傳下有龍人不敢近將士疑畏珙召麾下飲再行曰柴潭非天造地設樓伏弩能及遠而不可射近彼所恃此水耳決

而注之澗可立待皆曰隄堅未易鑿珙曰所謂堅者止
築兩隄首耳鑿其兩翼可也潭果決實以薪葦遂濟師
攻城擒其兩將斬之獲其殿前右副點檢溫端礫之城
下進逼土門金人驅其老稚焚為油號人油砲人不堪
其楚珙遣道士說止之端平元年正月辛丑黑氣壓城
上日無光降者言城中絕糧已三月鞍韉敗鼓皆糜煮
且聽以老弱互食諸軍日以人畜骨和芹泥食之又往
往斬敗軍全隊齧其肉以食故欲降者衆珙下令諸軍

銜枚分運雲梯布城下已酉珙帥師向南門至金字樓
列雲梯令諸將聞鼓則進萬衆競登大戰城上殺其元
帥烏凌阿及偏裨二百人開西門招布展入江海執其
叅政張天綱以歸珙問守緒所在天綱曰城危時即取
寶玉寘小室環以草號泣自經曰死便火我烟焰未絕
珙與布展分守緒骨得金寶玉帶金銀印牌有差

察罕圖復汴梁以大軍次虎牢先發遊騎南道出汴南
略歸亳陳蔡北道出汴東戰船浮於河水陸並下略曹

南據黃陵渡乃大發秦兵出函關過虎牢晉兵出太行
踰黃河俱會汴城下首奪其外城察罕自將鐵騎屯杏
花營諸將環城而壘賊屢出戰戰輒敗遂嬰城以守乃
夜伏兵城南旦日遣苗軍跳梁者略城而東賊傾城出
追伏兵鼓譟起邀擊敗之又令弱卒立柵外城以餌賊
賊出爭之弱卒佯走薄城西因突鐵騎縱擊悉擒其衆
賊自是益不敢出謀知城中計窮食且盡乃與諸將賀
宗哲賽音巴哈關係等議各分門而攻至夜將士鼓勇

登城斬關而入遂拔之劉福通奉其僞主韓林兒從數百騎出東門走屯安豐獲僞后及賊妻子數萬僞官五千符璽印章寶貨無算全居民二十萬軍不敢私市不易肆不旬日河南悉定

守

李繼隆在西陲會密詔廢夏州隳其城繼隆奏以為朔方古鎮賊所窺覷之地存之可依以破賊并請於銀夏兩州南界山中增置保戍以扼其衝且為內屬蕃部之

障蔽而斷賊之糧運皆不報

种世衡為廊州從事夏戎犯延安世衡建言延安東北
二百里故寬州請因其廢壘而興之以當寇衝左可
致河東之粟右可固延安之勢北可圖延銀夏之舊有
是三利朝廷從之以世衡董役事世衡膽勇過人雖逼
戎落曾不畏憚與兵民暴露數月且戰且城然處險無
泉議不可守鑿地百有五十尺始至於石工徒拱手曰
是不可井矣世衡曰過石而下將無泉耶爾其屑而出

之凡一畚償百金工復致其力過石數重泉果沛發萬人歡呼曰神乎雖虜兵重圍吾無困竭之患矣旣而朝廷署故寬州為青澗城世衡初至青澗教吏民習射雖僧道婦人亦習之以銀為射的中者與之旣而中者益多其銀重輕如故而其的漸遠且小矣或爭徭役優重亦使之射射中者得優處有過失亦使之射射中則釋之由是人人皆能射胡酋蘓慕恩部落最強世衡皆撫而用之嘗夜與慕恩飲出侍姬以佐酒旣而世衡起入

潛於壁隙窺之慕恩竊與侍姬戲世衡遽出掩之慕恩
慚愧請罪世衡笑曰君欲之耶即以遺之由是得其死
力諸部有貳者使慕恩討之無不克青澗東北一舍而
遠距無定河北有虜塞虜常濟河為患世衡數使屬羌
擊之往必破走前後取首級數百牛羊萬計未嘗勞士
卒也故功多而費寡建營田二千頃歲收其利募商賈
使通其貨或先貸之本速其流轉歲時問其息十倍乃
建白城中芻錢糧幣軍需城守之具皆不須外計一請

自給在青澗為屬吏所訟不法事按驗皆有狀廊延路
經畧使龐籍奏世衡披荊棘立青澗城若一一拘以文
法則邊將無所措手足詔勿問及徙知環州將行別龐
籍拜且泣曰世衡心腸鐵石也今日為公下淚矣

王韶守熙河引兵城渭源堡及乞神平堡破蒙羅角抹
耳水已等族初羌保險諸將謀置陣平地韶曰賊不舍
險來鬪則我師必徒歸今入險地當使險為吾有乃徑
趨抹邦山壓敵軍而陣令曰敢言退者斬賊乘高下鬪

師小却韶躬擐甲冒麾帳下兵逆擊之羗大潰焚其廬
帳而還洮西大振會賸征度洮為之援餘黨復集韶戒
別將由竹牛嶺路張軍聲而潛師越武勝遇賸征首領
賸藥等與戰破之遂城武勝建為鎮洮軍

岳飛拒賊於江西固石洞賊彭友悉衆至雩都迎戰躍
馬馳突飛麾兵即馬上擒之餘酋退保固石洞洞高峻
環水止一徑可入飛列騎山下令皆持滿黎明遣死士
疾馳登山賊衆亂棄山而下騎圍之賊呼丐命飛令勿殺

受其降

楊存中隆興二年金人再入關議割蜀之和尚原以界之存中入對曰和尚原隴右之藩要也敵得之則可以睥睨漢川我得之則可以下兵秦雍曩議予金人吳璘力爭不從今璘在遠不及知臣若不言非獨負陛下亦有愧於璘近者王師盡銳而後得願毋棄金人攻蜀所選士卒千取百百取十戰被重鎧登山攻險每一人前輒二人推其後前者死後者被其甲以進又死則又代

之其為必取計如此

張浚合五路兵次富平都統制又會諸將議戰吳玠曰
兵以利動今地勢不利未見其利宜擇高阜據之使不
可勝諸將皆曰我衆彼寡又前阻葦澤敵有騎不得使
何用他徙已而敵驟至輿柴囊土藉淖平行進薄玠營
軍遂大潰

董搏霄建議於朝曰淮南為南襟喉江淮要衝之地其
地一失兩淮皆未易復也則救援淮安誠為急務為今

日計莫若於黃河上下并瀕淮海之地及南自沭陽北
抵沂莒贛榆諸州縣布連珠營每三十里設一總砦三
十里又設一小砦使斥堠烽燧相望而巡邏往來遇賊
則并力野戰無事則屯種而食然後進有援退有據此
善戰者所以自為不可勝以待敵之可勝也

魏勝字彥威淮陽軍宿遷縣人多智勇善騎射應募為
弓箭手紹興三十一年金人將南侵聚芻糧造器械籍
諸路民為兵勝躍曰此其時也聚義士三百北渡淮取

漣水軍宣布朝廷德意不殺一人漣水民翕然以聽遂
取海州郡守渤海高文富聞勝起遣兵來捕勝迎擊走
之追至城下衆驚傳水陸悉有兵城中大恐文富閉門
守驅民上城禦之勝令城外多張旗幟舉烟火為疑兵
又遣人向諸城門諭以金人棄信背盟無名興師本朝
寬大愛民之意城上民聞之即開門勝遣勇銳者登城
樓餘自門入莫有禦者獨文富與其子安仁率牙兵拒
守勝整軍與安仁父子戰譙門內殺安仁及州兵千餘

擒文富民皆安堵勝權知州金人多伏兵勝兵遇伏皆
赴砦金人襲之勝單騎而殿以大刀奮擊金人望見勝
知其為將也以五百騎圍之數重勝馳突四擊金兵追
之馬中矢踣步而入砦無敢當者金人又急攻絕其水
砦中食乾糲殺牛馬飲血勝默禱而雨驟作金人攻益
急周山為營勝度其必復攻海州因間出砦趨城中金
人果解蒼山圍自新橋抵城下勝出戰皆捷金分兵四
面攻勝募士登城以禦矢石如雨者七日金兵死傷多

遁去勝嘗出戰矢中鼻貫齒不能食猶親禦戰勝起義父
朝廷尚未知沿海制置使李寶遣其子公住由海道覘
敵至州始遣忠義將朱震褚道諧行在白勝姓名於執
政始知勝之功焉金人遣山東路都統總管以兵十萬
攻海州時寶帥海州水陸並進抵城北砂巷勝率衆合
寶軍大破之斬首不可計堰水為之不流餘悉奔潰勝
獨率兵追北二十里至新橋又破之盡獲其鞍馬器甲
寶亦駐海州為進取計金人復遣烏津太師發諸路兵

二十萬來攻海州先遣一軍自州西南斷勝軍餉道勝
擇勇悍士三千餘騎拒於石闥堰金軍不能進逮夜始
還畱千人備險隘金兵十萬來奪勝率衆鏖戰殺數千
人餘皆遁去下令守險勿追報寶寶以防海道登舟不
復發兵金兵盛集勝力拒之自旦至暮金兵不能奪勝
令步卒整隊前行自為殿時百姓以寶既登舟懼金兵
大至皆欲入城統制郭蔚閉城門不納人民牛馬蔽野
呼號動地城中亦懼勝入城諭以賊勢退怯之狀固守

可保無虞乃開門盡納之居無何金兵環城圍數重勝
與郭蔚分兵備禦偃旗息鼓寂若無人金人驚疑數日
不敢攻已乃植雲梯置砲石四面合圍負土填壕勝俟
其近城鳴鼓張旗矢石俱發繼以火牛金液凡三晝夜
金兵竟不能近於是罷攻脩營壘絕河道謀為固守勝
俟其不備掩擊或獨出擾之使不得休息又間夜發兵
劫其營或焚其攻具既而金人併力急攻勝告急於李
寶寶以聞還報城中已命張子蓋率兵來解圍金人亦

知子蓋軍且至已有退意頃之子蓋先帥騎兵至勝出
與子蓋議戰事且促其步卒勝出軍城北砂巷與金軍
大戰斬首不可計追數十里餘兵皆遁勝與子蓋議進
討子蓋曰受詔解圍不知其他遂率軍還城中疑懼欲
隨王師出勝親邀於道而議之至漣水軍與偕還時都
督張浚在建康招勝詢以軍務轉閣門宣贊舍人差充
山東路忠義軍都統制仍知海州隆興元年詔以鎮江
御前同統制魏全來守海州督府亦遣賈和仲充山東

河北路招撫使節制本路軍馬海州駐劄和仲忌勝陰誘忠義軍使不安勝與辯是非和仲又讒勝於都督都督惑之呼勝至鎮江計事罷其職改京東路馬步軍副總管都督府統制建康府駐之既而督府知和仲所誣罷之復勝舊職勝既還海州鎮撫一方民安其政海州城西南枕孤山賊至登山瞰城中虛實立見故西南受敵最劇勝築重城圍山在內寇至則先據之不能害

吳玠守蜀烏珠及劉夔率十萬騎入侵自鐵山鑿崖開道循嶺東下玠以萬人當其衝弟璘率輕兵由七方關倍道而至與金兵轉戰七晝夜始得與玠合敵首攻玠營玠擊走之又以雲梯攻壘壁玠使人以撞竿碎其梯以長矛刺之璘拔刀畫地謂諸將曰死則死此退者斬金分軍為二烏珠陣於東韓常陣於西璘率銳卒介其間左縈右繞隨機而發戰久璘軍少憊急屯第二隘金生兵踵至人披重鎧鐵鈎相連魚貫而上璘以駐隊矢

迭射矢下如雨死者層積敵踐而登薩里罕駐馬四視
曰吾得之矣命攻西北樓姚仲登樓酣戰樓傾以帛為
繩挽之復正金人用火攻樓以酒缶撲滅之玠急遣田
晟率兵以長刀大斧左右擊明炬四山震鼓動地明日
大出兵統領王喜王武率銳士分紫白旗入金營金陣
亂奮擊射韓常中左目金人始宵遁

梁侯景反陷歷陽至新林帝使羊侃入副宣城王都督
城內諸軍景卒既至百姓競入公私混亂無復次序侃

乃區分防礙皆以宗室間之軍人爭入武庫自取器甲
所司不能禁侃命斬數人爭方得止及賊逼城衆皆恟
懼侃偽稱得外射書云邵陵西昌侯已至近路衆乃少
安賊攻東掖門縱火甚盛侃以水沃滅火射殺數人賊
乃退有詔送金五千兩銀五千兩絹萬疋賜戰士侃辭
不受部曲千餘人並私加賞賚賊為火頭木驢攻城矢
石所不能制侃作雉尾炬施鐵鎚以油灌之擲馱驢上
焚之俄盡賊人又東西築二土山以臨城城中震駭侃

命為地道潛引其土山不能立賊又作登城樓高十餘丈欲臨射城中侃曰車高塹虛彼來必倒可卧而觀之及車動果倒衆皆服焉賊既頻攻不捷乃築長圍朱异張綰議出擊之帝以問侃曰不可賊多日攻城不能下故立長圍欲引城中降者耳今擊之出人若少不足破賊若多則一旦失利門隘橋小必大致挫衄不從遂使千餘人出戰未及交鋒望風退走果以爭橋赴水死者大半

西魏將韋孝寬守玉壁時東魏大將高歡傾山東之衆志圖西入以玉壁衝要先命攻之連營數十里乃於城南起土山欲乘之以入當其山處城上先有兩高樓孝寬更縛木接之令極高峻多積戰具以禦之歡使謂城中曰縱爾縛樓至天我會穿城取爾遂於城南鑿地道又於城北起土山且作且攻晝夜不息孝寬復掘長塹截其地道仍簡戰士屯城外塹上每穿至塹戰士即擒殺之又於塹外積柴貯火敌人有在地道內者便下柴

火以皮鞣吹之火氣一衝咸即灼爛城外又造攻車車之所及莫不摧毀雖有排楯莫之能撓孝寬乃縫布為幔隨其所向則張設之布旣懸於空中其車竟不能壞城外又縛松於竿灌油加火規以燒布并欲焚樓孝寬復作長鐵鈎利其鋒刃火竿旣來以鈎遙割之松麻俱落城外又於城西面穿地作三十一道分為四路於其中各施梁柱作訖以油灌柱放火燒之柱折城並崩壞孝寬又隨崩處豎木柵以扞之敵不能入城外盡其攻

擊之術孝寬咸拒破之歡無如之何乃遣倉曹參軍祖
孝徵謂曰未聞救兵何不降也孝寬報云我城嚴固兵
有食餘攻者自勞守者常逸豈有旬朔之間已須救援
適憂爾衆有不測之危我關西男子必不為降將軍也
孝徵乃射募格於城中云能斬城主降者拜太尉封郡
公邑萬戶賞帛萬疋孝寬手提書背反射城外云若有
斬高歡者一依此賞孝寬弟子遷先在山東又鎖至城
下臨以白刃云若不早降便行大戮孝寬慷慨激揚略

無顧意士卒莫不感勵歡苦戰六旬傷及病死者十四
五智力俱困因而發疾夜遁去後因此遂卒

魏王思政守潁川東魏太尉高岳來攻築土山以臨城
飛梯火車盡攻擊之法思政亦作火稍因迅風便投之
土山又射以火箭燒其攻具仍募勇士縋而出戰據其
兩土山置樓堞以助防守高澄更益岳兵堰洧水以灌
城時有怪獸每衝壞其堰然城被灌已久多亦崩壞岳
悉衆苦攻思政身當矢石與士卒同勞苦岳乃更脩堰

作鐵龍雜獸用堰水神堰成水大至城中水泉湧溢懸釜而炊糧力俱絕慕容紹宗劉豐生及慕容永珍意以為開共乘樓船以望城內合善射人俯射城中俄而大風暴起船乃飄至城下城上人以長鉤牽船弓弩亂發紹宗窮迫赴水而死豐生浮向土山復中矢而斃擒永珍并獲船中器械思政謂永珍曰僕之破亡在於畧漏誠知殺卿無益然人臣之節守之以死乃流涕斬之思政初入潁川士卒八千人被圍既久城中無鹽腫死者

十六七及城陷之日存者纔三千人雖外無救援亦無
叛者高澄乃率步騎十萬來攻自於堰下督勵士卒增
功築堰時盛夏水壯城北面遂壞頃之水便益滿無措
足之地遂被擒高澄義而禮之

唐馬燧鎮太原燧以晉陽王業所起度都城東西平易
受敵時天下騷動北邊數有警急乃引晉水架汾而注
城之東瀦以為池寇至計省守陴者萬人又決汾水環
城多為池沼植柳以固堤太原承前政鮑防敗軍之後

兵甲寡弱燧乃悉召將吏牧馬廐役得數千人悉補騎卒教之數月為精騎造甲者今為長短三等稱其所衣以便進趨

唐朱泚亂德宗幸奉天數日賊軍至造雲橋成闊數丈以巨輪為脚推之使前施濕氈生牛革多懸水囊以為障直指城東北隅兩旁構木為廬冒以牛皮迴環相屬負土運薪於其下以填壕塹矢石不能傷城中恟懼相顧失色帝召渾瑊勉諭之令齋空名誥身自御史大夫

實封五百戶已下者千餘軸募諸軍突將敢死之士以當之兼賜瑊御筆一管當戰勝量其功伐即著其名授之不足者筆書其身因命以位撫瑊背而遣之前一日瑊揣雲橋來路先鑿地道下深丈餘上積馬糞深五六尺次二日即令爇火次一日復下柴薪夜燒之平明火焰高於城壘是時北風正急賊乃隨風推橋以薄城下賊三千餘人相繼而登城上士卒皆大寒餒又少甲冑瑊但感激誠勵之以饑弱之衆當劇賊之鋒雖力戰應

敵人憂不濟公卿以下仰首祝天賊徒至地道所橋腳陷不能進須臾風迴轉焰雲橋焚為燼灰賊焚死者數千城中歡譟振地時城中流矢遽自拔之血流霑足格鬪不已不言瘡痛以激士心既而李懷光大軍至賊解圍去

吳少誠攻許州上官浣知節度畱後欲棄城走判官劉昌裔追止之曰畱後既受詔宜以死守城況城中士馬足以破賊但堅壁不戰不過五七日賊勢必衰我以全

制之可也。況然之賊，日夕攻急，堞壞不得脩，昌裔令造戰棚、木柵以代之。募壯士破營，得突將千人，鑿城分出，大破之，因立戰棚、木柵於城上，以故不陷。

五代梁軍敗於上黨，晉人乘勝進迫澤州。河南留守張全義遣牛全節救之。時晉人新勝，其鋒甚盛，存節引軍而前，銜枚夜至澤州。晉軍尋至，乃分布守禦。晉軍四面攻鬪，開地道以入城。存節亦以隧道應之，逆戰於地中。晉軍不能進，又以勁弩射之中者，人馬皆洞。經十三日，晉軍死傷甚

衆焚營而退郡以獲全

黃巢陷長安趙犇為陳州刺史謂諸將吏曰以吾計巢不為長安市人所誅必驅其衆東走吾州適當其衝矣乃治城池為守備遷民六十里內者皆入城中選其子弟配以兵甲以其弟景珣為將巢敗果東走先遣孟楷據城景擊破之執楷歸巢從後至聞楷被執大怒旣而秦宗權以蔡州附巢巢勢甚盛乃悉衆圍犇置舂磨糜人之肉以為食陳人恐犇語其下曰君家三世陳將必

能保此爾曹男子第當於死中求生建功立業未必不
因此時陳人皆踴躍巢柵城北三里為八仙營營間置
百官聚餉糧欲以久敝之其兵號二十萬陳人舊有巨
弩數百廢壞後生弩工皆不識其器珣創意理之弩矢
激五百步人馬皆洞以故巢不敢近圍凡三百日顰食
將盡乃乞兵於梁梁太祖與李克用皆自將會擊敗巢
將黃鄴於西華西華有積粟巢恃以為餉鄴又敗巢乃
解圍去

淮南兵圍蘓州推洞屋攻城吳越將臨海孫琰置輪於竿首垂絙投錐以揭之攻者盡露礮至則張網以拒之淮南人不能克吳越王鏐遣牙內指揮使錢鏐行軍副使杜建徽等將兵救之蘓州有水通城中淮南張網綴鈴懸水中魚鼈過皆知之吳越游奕都虞侯司馬福欲潛行入城故以竿觸網敵聞鈴聲舉網福因得過凡居水中三日乃得入城由是城中號令與援兵相應敵以為神

晉將李嗣昭守潞州汴將李思安將兵十萬攻之乃築夾城深溝高壘內外重複飛走路絕嗣昭撫循士衆登城拒守嘗饗士嗣昭張樂流矢中足密拔之坐客不之覺酣飲如故以安士心梁祖馳書說誘百端嗣昭焚其書斬其使者城中固守經年晉王率周德威等來攻梁軍梁兵大潰嗣昭方開門

後周韋孝寬在汾州屬生胡抄掠居人阻斷河路孝寬深患之而地入於齊無方誅剪欲當要處置一大城乃

於河西徵役徒十萬甲士百人遣開府姚岳監築之岳色懼以兵少為難孝寬曰計成此城十日即畢既去晉州四百餘里一日創手二日偽境始知設令晉州徵兵二日方集謀議之間自稽三日計其軍行三日不到我之城墮足得辦矣乃令築之齊人果至南首疑有大軍乃停畱不進其夜又令汾州以南傍介山稷山諸村所在縱火齊人謂是軍營遂收兵自固版築克就卒如其言

唐貞元中楊朝晟奏方渠合道水波皆吐蕃要路請城其地以備之詔問所須幾何朝晟奏曰臣部下兵自可集事不煩外助復問前築鹽州凡興師七萬今何其易也朝晟曰鹽州之役諸軍蕃戎盡知之今臣境邊虜若大興兵即戎蕃來寇寇則戰戰則無暇城矣今請密發軍士不十日至塞下未三旬而工畢蕃人始知已無奈何上從之已事軍還吐蕃始來數日退

張仁愿為朔方軍總管先是朔方軍北至突厥以河為

界河北岸有拂雲神祠突厥將入寇必先詣祠祭酬求
福因收馬料兵而後渡河時突厥嘿啜盡衆西擊突厥
施葛娑仁愿請乘虛奪取漠南之地於河北築三受降
城首尾相應以絕南寇之路太子少師唐休景以為西
漢已來皆北守黃河今於寇境築城恐勞人費功終為
賊虜所有建議以為不便仁愿固請不已中宗竟從之
六旬而三城俱就以拂雲祠為中城與東西兩城相去
各四百餘里皆據津濟遙相應接北拓地三百餘里於

牛頭朝那山北置烽埃一千八百所自是突厥不得度
山牧馬朔方無復寇掠滅鎮兵數萬人仁愿初建三城
不置壅門及格曲戰敵之具或問曰此邊城禦賊之所
不為守備何也仁愿曰兵貴在攻取不宜退守寇若至
則當併力出戰迴顧望城猶須斬之何用守備則生其
退惡之心也其後常元楷為朔方軍總管始築壅門以
備寇議者以此重仁愿而輕元楷焉

劉昌為涇原營田使躬率士衆力耕三年軍食豐羨受

詔築城平涼以扼彈箏峽口昌命從事旬餘而畢又於平涼西別築胡谷堡名曰彰信平涼當四會之衝居北地之要分兵援戍遏其要衝築神威軍於青海中龍駒島名神龍城吐蕃屏跡不敢近青海

范希朝為振武節度使有党項室韋交居川阜凌犯為盜日入慝作謂之刮城門居人懼駭鮮有寧日希朝於要害處置堡柵斥埃嚴密人遂獲安

隋時突厥入寇隋將楊素擊之先是諸將與虜戰每慮


胡騎奔突皆戎車步騎相參舁鹿角為方陣騎在其內
素謂人曰此乃自固之道非取勝之方也於是悉除舊
法令諸軍為騎陣突厥頭可汗聞之大喜率精騎十餘
萬而至素奮擊大破之素多權畧乘機赴敵應變無方
然大抵馭戎嚴整有犯軍令者立斬之無所寬貸每將
臨寇求人過失而斬之多者百餘人少不下十數流血
盈前言笑自若及其對陣先令一二百赴敵陷陣而還
者則已如不陷陣而還者無問少長悉斬之又令二三

百人復進還如向法將士股慄有必死之心由是戰無不勝時稱名將

宋五路討李繼遷以李重貴為麟府都部署得對殿因言賊居沙磧中逐水草牧畜無定居便於戰鬪利則進不利則走今五路齊入彼聞兵勢大或不來接戰且謀遠遁欲追則人馬乏食將守則地無堅壘賊輩未平臣何顏以見陛下太宗善之出御劍以賜又遣使撫勞至則諸將果無大功

太平興國一年梅山洞蠻叛命田紹斌翟守素分路掩擊至邵州聞蠻酋包漢陽死去其居十里而陣大敗之擒蠻二萬令軍取利劍二百斬之畱五千餘人遣歸使曉諭諸洞自是蠻人不擾三年梅山洞蠻恃險又叛詔遣翟守素率諸州屯兵往擊之值霖雨彌旬弓弩解弛不堪挽明日將接戰守素一夕令削木為弩及旦賊奄至交射之賊遂敗乘勝逐北盡平其巢穴先是數郡大吏富人多與賊帥包漢陽交通旣而得其書訊數百封

守素並焚之反側以定



武編後集卷二